

湖南財政廳廳長陳君墓碑

茶陵譚延闓撰

君諱炳煥字樹藩晚更號注凡湖南湘陰人先世自長沙來遷  
曾祖諱太志祖諱任官父諱正昌兄弟四人君其仲也家世爲  
農父始以商發名君少學賈年十八乃讀書通經史有大志中  
法之役徒步從軍廣西間關困苦會兵罷歸益肆力於學補縣  
學生遊學省城諸書院最爲郭筠仙侍郎所知賞旣食廩餼肆  
業兩湖書院慷慨言事驚諸老儒南皮張文襄奇之令往日本  
考察政治通爲學校教習旋任湖南中路師範學堂監督出任  
湖南留日學生監督之奉天總理圖書館被選爲湖南諮議局

議員及副議長辛亥湖南革命爲總務部長改湖南財政司長  
民國元年任湖南國稅籌備處長二年去官五年護國軍興爲  
湖南礦務總理九年爲湖南財政廳長其時君已疾病力起任  
事十月二十二日以疾卒官春秋六十有一以其年十一月二  
十五日葬於長沙雷衝嶺北石塘灣前山之陽禮也君沈毅廉  
分學尙實踐不爲高論清末國勢日蹙志士思奮夸者率詬呼  
自喜君不屑也嘗曰君輩口論事吾欲以身行事聞者未許之  
及革命起君子姪皆以文武立功名黃克強先生尤致禮君羣  
乃歎服延闈始識君由相代爲學校監督又同爲諮議局議員

心敬異君以爲古之能決大疑任大事者君足以當之辛亥九月湖南起義同輩皆軍人書生政府成擾攘一無辦君慨然任財政司長內調劑軍食外出師援鄂未嘗困乏民國旣建府庫空竭君謂延闔曰國者省之積省各自謀國將何賴湖南雖貧不可自外乃輦金三十萬致中央有識歎美湖南田賦縣各異制官吏因緣爲奸君曰經界不正國與民交病今茲未能且盡去征稅雜立諸名目一以正稅爲衡定納稅額數使人人皆自知有田幾何稅當幾何無能侵匿行之民大便十七年來他省或承清敝習湖南獨無由此也當軍興事皆資紙幣言者憂之

君獨謂紙幣非病病在信不立乃規畫所以整齊之方皆今歐美所已行效可睹者會君去官策不得究君之任事恢弘多智計持大體不務苛細而經緯分明用人各盡其長然率期年數月罷去未能盡其施類如此可惜也當是時他省皆賴中央所舉債湖南號貧省而裁兵數萬境內晏然大興學校建工廠興辦諸礦遣留學歐美生費至數百人一倚君爲辦君處之裕如後雖悉廢罷而當時固斐然嚮治矣諸媚嫉不慊君者或爲蜚語甚欲危害之治事益力始終未嘗自表襮及君卒而論者翕然知與不知皆歎息謂今無復此人也君負用世材略志不僅

在一省殫心黨國以隕其生今國家統一庶政待舉使君參措其間必大發舒以有利於世而君之卒已十年此尤夙共艱厄者所懷思悲悼而不能已者也夫人歐陽氏先君卒側室唐氏子六嘉祐中國國民黨中央執行委員第十四軍軍長嘉任湖南省政府委員民政廳廳長嘉燦長沙樞運分局局長嘉俊嘉應嘉實女四長適長沙李冕成嘉祐等秉君遺訓克見黨國之成功乃伐石立碑以銘不朽而延闔爲之辭曰

世變不亟成功實難羣疑眾咻遺我百艱惟君英英經綸萬端不折不撓靖此疑患口不言勞功亦不竟時不我與而君何病

策本萬全廉亦細行存而相輕歿始知敬國誰與立人之云亡  
凡百有位慨念凋瘵巨寢偃然湘水湯湯徒令後人瞻仰彷徨